



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu Kazu
Tribunál Distritál Baucau
Edisaun Fevereiru 2018

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 30

Artigu	Tipu Kazu	Númeru
Artigu 145 (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	12
Artigu 145 (KP)	Ofensa ba integridade fízika simples	4
Artigu 172 no 173 (KP)	Violasaun seksuál	4
Artigu 154 (KP)	Maus tratus ba kónjuje	3
Artigu 177 (KP)	Abuzu seksuál ba menór	1
Artigu 177 (KP) no artigu 182 (KP)	Abuzu seksuál ba menór no agravasaun	1
Artigu 171 (KP)	Koasaun seksuál	1
Artigu 138 (KP)	Omisídiu simples	1
Artigu 157 (KP)	Ameasa	1
Artigu 322 (KP)	Esplorasaun ba jogu ilísitu	1

Artigu 207 (KP)	Kondusaun sein karta	1
Totál		30

2. Totál desizaun ne'ebé JSMP monitoriza: 23

Tipu desizaun	Númeru
Suspensaun ba prizaun nia ezekusaun (artigu 68 KP)	11
Pena multa (artigu 67 KP)	7
Pena prizaun (artigu 66 KP)	4
Omologa pedidu dezisténsia keixa	1
Totál	23

3. Totál kazu ne'ebé sei kontinua prosesu tuir JSMP nia monitorizasaun: 7

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu : 0061/16. BCBCV
 Kompozisaun Tribunál : Singulár
 Juis : Dr. Jose Goncalves
 Prokuradór : Dra. Ivonia Maria Guterres
 Defeza : Dr. Jose M. Guterres
 Tipu pena : Pena prizaun fulan 6 suspende ba tinan 1

Iha 2 Fevereiru 2018, Tribunál Distritál Baucau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 9 Novembru 2016, iha tuku 12.00 meudia, arguidu tolok lezada no tuku dala 1 iha lezada nia kelen iha parte karuk. Arguidu tuku tan dala 1 iha lezada nia kotuk laran no kaer no dada lezada nia fuuk ho maka'as.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 Lei Kontra Violénsia Doméstika (LKVD).

Produsaun ba prova

Durante julgamentu arguidu konfesa faktus hotu iha akuzasaun. Arguidu mós deklara katak foin primeira-vez mai hatan iha Tribunál no diak malu ona ho lezada. Iha parte seluk lezada konfirma no kontinua reforsa faktus sira iha akuzasaun. Lezada mós deklara katak diak malu ona ho arguidu.

Alegasaun final

Prokuradór konsidera faktus hotu provadu bazeia ba konfisaun arguidu nian no deklarasaun hosi lezada. Tanba ne'e husu ba Tribunál atu kondena arguidu ho pena prizaun fulan 6 suspende ba tinan 2.

Iha parte seluk Defeza haktuir katak arguidu konfesa faktus hotu iha akuzasaun, foin primeira-vez mai hatan iha Tribunál, diak malu ona ho lezada no arguidu promete sei la komete tan krime hasoru lezada iha futuru. Tanba ne'e husu ba Tribunál aplika pena ne'ebé adekua ba arguidu.

Desizaun

Depoide avalia faktus provadu ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu mós kustu judisiál US\$10.00.

2. Krime ofensa ba integridade fízika simples

Nú. Prosesu : 0023/16. BCLGA
Kompozisaun Tribunál : Singulár
Juis : Dr. Jose Goncalves
Prokuradór : Dra. Ivonia Maria Guterres
Defeza : Dr. Sidonio Maria Sarmiento
Tipu pena : Pena multa

Iha 2 Fevereiru 2018, Tribunál Distritál Baucau prezide julgamentu leitura sentensa ba krime ofensa ba integridade fízika simples ne'ebé envolve arguidu Domingos Barbosa hasoru lezadu Jose Piedade, iha Suku Sagadate, Sub-distritu Laga, Distritu Baucau.

Akuzasaun Prokuradór

Prokurador akuza katak iha 20 Outubru 2016, iha tuku 12.20 meudia, arguidu tuku dala 1 iha lezadu nia ibun no kauza lezadu sofre kanek no ran iha lezadu nia ibun no rezulta lezadu konsege ba halo tratamentu iha Sentru Saúde Laga. Kazu ne'e akontese iha merkadu Teriloidae, wainhira lezadu no arguidu hatan malu kona-ba arguidu nia dezeju atu kandidata lezadu ba xefe aldeia, maibé lezadu la konkorda tanba lezadu dehan katak nia la iha kapasidade atu ba kaer pozisaun ne'e. Tanba ne'e, arguidu trata no tolok lezadu no komete aktu ne'e hasoru lezadu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal to'o tinan 3 prizaun ka multa.

Produsaun ba prova

Durante julgamentu, arguidu konfesa faktus hotu iha akuzasaun, arguidu mós deklara katak arrepende ona nia hahalok, foin primeira-ves mai hatan iha Tribunál no promete sei la komete

tan krime hasoru lezadu iha futuru. Iha parte seluk lezadu kontinua konfirma faktus hotu iha akuzasaun.

Alegasaun final

Prokurador konsidera arguidu provadu komete krime ne'e hasoru lezadu bazeia ba konfisaun arguidu rasik no deklarasaun lezadu nian. Tanba ne'e husu ba Tribunal atu kondena arguidu ho pena prizaun tinan 1 suspende ba tinan 3.

Iha parte seluk Defeza haktuir katak arguidu konfesa faktus hotu iha akuzasaun, primeira-ves mai hatan iha Tribunal, no diak malu ona ho lezadu. Tanba ne'e husu ba Tribunal aplika pena ne'ebé adekuadu ba arguidu.

Desizaun

Tribunal konklui prosesu ne'e no kondena arguidu ho pena multa US\$45.00 ne'ebé sei selu 0.50 sentavus kada lora durante lora 90. Tribunal mos fiksa pena alternativa durante lora 90 prizaun, wainhira arguidu la kumpri pena refere.

3. Krime ofensa ba integridade fizika simples ho natureza violensia domestik

Nú. Prosesu	: 0014/17. VQOSU
Kompozisaun Tribunal	: Singulár
Juis	: Dr. Afonso Carmona
Prokurador	: Dr. Luis H. Rangel da Cruz
Defeza	: Dr. Jose Maria Guterres
Tipu pena	: Pena prizaun fulan 6 suspende ba tinan 1

Iha 2 Feveiru 2018, Tribunal Distritál Baucau prezide julgamentu leitura sentensa ba krime ofensa ba integridade fizika simples ho natureza violensia domestik ne'ebé envolve arguidu ABP hasoru nia feen, iha Distritu Viqueque.

Akuzasaun Prokurador

Prokurador akuza katak iha 7 Jullu 2017, iha tuku 08.40 dadeer, arguidu tuku dala 1 iha lezada nia kotuk laran no tebe dala 1 iha lezada nia kanuruk.

Prokurador akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Iha julgamentu arguidu konfesa faktus hotu iha akuzasaun no deklarasaun katak diak malu ona ho lezada, arrepende ona nia hahalok no promete sei la komete tan krime hanesan hasoru lezada iha futuru. Iha parte seluk lezada kontinua konfirma faktus hotu iha akuzasaun.

Alegasaun final

Prokurador konsidera faktus hotu provadu bazeia ba konfisaun arguidu nian no deklarasaun hosi lezada. Tanba ne'e husu ba Tribunal aplika pena prizaun fulan 3 suspende ba tinan 1.

Iha parte seluk Defeza haktuir katak arguidu konfesa faktus hotu iha akuzasaun, arrepende ona nia hahalok, diak malu ona ho lezada no promete sei la komete tan krime hanesan hasoru lezada. Tanba ne'e husu ba Tribunál aplika pena ne'ebé adekua ba arguidu.

Desizaun

Depoide avalia faktus ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu mós kustu judisiál US\$20.00.

4. Krime maus tratus ba kónjuje

Nú. Prosesu : 0003/17. PDBAU
Kompozisaun Tribunál : Kolektivu
Juis : Dr. Afonso Carmona
: Dr. Jose Goncalves
: Dr. Hugo da Cruz Pui
Prokuradór : Dr. Domingos Goveia Barreto
Defeza : Dr. Sidonio Maria Sarmiento
Tipu pena : Pena prizaun tinan 2 fulan 6 suspende ba tinan 2 fulan 6 no
indemnizasaun sivil

Iha 7 Feveireiru 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu TFX hasoru nia feen, iha Distritu Baucau.

Akuzasaun Prokuradór

Prokuradór akuza katak iha 29 Dezembru 2016, iha tuku 19.00 kalan, lezada halai ba hela iha nia tiu nia uma no to'og agora la fila fali ba uma, tanba tauk ho arguidu.

Antes ida-ne'e, iha 07 Novembru 2016, iha tuku 20.00 kalan, arguidu tuku dala 1 iha lezada nia liman kabun loos no tebe dala 1 iha lezada nia ain loos.

Iha 19 Outobru 2016, iha tuku 04.00 madrugada, arguidu tuku dala 1 iha lezada nia liman kabun loos no tebe dala 1 iha lezada nia kotuk laran. Iha data ne'ebé la apurada, maibé iha Outobru 2016, arguidu kaer lezada nia fu'uk no riba lezada ba rai no tebe dala 1 iha lezada nia kabun no rezulta lezada sofre kanek no ran iha lezada nia ulun.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 to'og tinan 6 no konjuga ho artigu 2, 3, 35 no artigu 36 hosi LKVD.

Produsaun ba prova

Durante julgamentu, arguidu konfesa faktus hotu iha akuzasaun, arguidu mós deklarata katak arrepende ona nia hahalok no foin primeira-vez mai hatan iha Tribunál no hakarak diak malu fali ho lezada. Iha parte seluk lezada konfirma faktus hotu iha akuzasaun, lezada mós husu ba arguidu atu responsável ba sira nia oan nain 1 ne'ebé foin fulan 4.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Tanba ne'e husu ba Tribunál atu kondena arguidu ho pena prizaun tinan 3 suspende ba tinan 3.

Defeza husu ba Tribunál atu kondena arguidu ho pena ne'ebé kmaan, tanba arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no diak malu fali ona ho lezada.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 fulan 6 suspende ba tinan 2 fulan 6 no indemnizasaun sivil ba lezada US\$200.00 no selu kustu judisiál US\$30.00.

5. Krime koasaun seksuál

Nú. Prosesu	: 0012/16. VQOSU
Kompozisaun Tribunál	: Kolektivu
Juis	: Dr. Afonso Carmona Dr. Jose Goncalves Dr. Hugo da Cruz Pui
Prokuradór	: Dr. Domingos Goveia Barreto
Defeza	: Dr. Sidonio Maria Sarmiento
Tipu pena	: Pena prizaun tinan 5

Iha 7 Fevereiru 2018, Tribunál Distritál Baucau prezide julgamentu leitura akordaun ba krime tentativa violasaun seksuál ne'ebé envolve arguidu AdS hasoru lezada MAdS, iha Distritu Viqueque.

Akuzasaun Prokuradór

Prokuradór akuza katak iha 17 Juñu 2016, maisumenus iha tuku 14.00 meudia, lezada hosi nia hela fatin Merkadu Ossu atu ba hare nia inan moras iha foho. Wainhira to'o iha mota Waibere, lezada hare hetan arguidu ne'ebé lao tuir lezada hosi lezada nia kotuk, nune'e lezada hasé no husu ba arguidu katak atu ba ne'ebé? Maibé derepente arguidu hakbesik lezada ho forsa no obriga kaer lezada nia liman no husu lezada nia número telefone, maibé lezada rejeita. Depoisdé ne'e arguidu husik tiha lezada nia liman maibé arguidu kontinua lori nia liman loos taka lezada nia ibun no liman karuk buti lezada nia susun. Arguidu kontinua kaer lezada nia liman no lao hamutuk ho lezada maisumenus to'o metru 20, arguidu kaer lezada nia kabas rua hanehan ba rai hasai lezada nia roupa no arguidu mós hasai nia roupa no kose nia orgaun seksuál ba lezada nia orgaun seksuál. Iha akontesementu ne'e lezada tenta atu hakilar, maibé la iha ema ruma mak rona tanba iha rai fuik-laran.

Prokuradór akuza arguidu kontra artigu 172 Kódigu Penál kona-ba krime violasaun seksuál ho moldura penal tinan 5 to'o tinan 15 no artigu 23, 24 alinea (1) Kódigu Penál kona-ba tentativa no tentativa nia punibilidade.

Produsaun ba prova

Iha julgamentu arguidu nega faktus hotu iha akuzasaun Prokuradór nian. Arguidu deklar katak arguidu kaer lezada nia liman wainhira sai eskola no arguidu deklar katak nia lahatene kona-ba faktu sira seluk relasiona ho akontesementu ne'e. Iha parte seluk lezada kontinua konfirma faktus hotu iha akuzasaun, no deklar katak depoisde komete tiha asaun ne'e arguidu halai tiha ba nia uma, nune'e lezada ba fó hatene lezada nia aman no sira ba tuir arguidu iha nia uma. Wainhira lezada nia aman husu ba arguidu kona-ba akontesementu ne'e, maibé arguidu nega faktus sira ne'e hotu, nune'e lezada ho nia aman ba hato'o kedas keixa iha Polisia Eskuadra Ossu.

Testemuña AFX nu'udar lezada nia aman depoimenta katak wainhira lezada fó hatene testemuña katak arguidu estraga ona lezada, nune'e testemuña ho lezada ba husu tuir arguidu iha nia uma maibé arguidu nega katak la komete asaun ne'e hasoru lezada, nune'e testemuña ba hato'o kedas kixa iha Polisia Eskuadra Ossu.

Alegasaun final

Prokuradór haktuir katak iha produsaun ba provas arguidu nega totalmente ba faktus hotu iha akuzasaun, maibé lezada kontinua konfirma faktus hotu iha akuzasaun katak krime ne'e akontese duni. Prokuradór mós deklar katak iha akontesementu ne'e arguidu kose deit nia orgaun seksuál ba lezada nia orgaun seksuál. Tanba ne'e husu ba Tribunál atu halo alterasaun juridiku husi krime violasaun seksuál artigu 172 KP ba fali 171 KP kona-ba krime koasaun seksuál. Hafoin ida-ne'e husu ba Tribunál atu kondena arguidu ho pena prizaun tinan 3 fulan 6.

Enkuantu Defeza haktuir katak iha julgamentu arguidu deklar katak la komete faktus ne'ebé Prokuradór akuza ba arguidu. Tanba ne'e husu ba Tribunál atu fó justisa ba arguidu.

Desizaun

Depoisde avalia faktus sira ne'ebé produs durante julgamentu, Tribunál konsidera ho pedidu alterasaun juridiku hosi Prokuradór hodi altera artigu 172 KP kona-ba violasaun seksuál ba fali artigu 171 KP kona-ba krime koasaun seksuál. Tribunál konsidera katak arguidu provadu komete krime koasaun seksuál hasoru lezada la'os violasaun seksuál tuir artigu 172 KP tanba la priense rekizitus hosi artigu 172 KP. Bazeia ba alterasaun ne'e Tribunál konklui prosesu ne'e no kondena arguidu ho pena prizaun tinan 5.

6. Krime ofensa ba integridade fízika simples

Nú. Prosesu	: 0014/17. VQWTL
Kompozisaun Tribunál	: Singular
Juis	: Dr. Jose Escurial
Prokuradór	: Dr. Gustavo da Silva Moreira
Defeza	: Dr. Sidonio Maria Sarmiento
Tipu pena	: Pena prizaun fulan 6 suspende ba tinan 1

Iha 7 Fevereiru 2018, Tribunál Distritál Baucau prezide julgamentu leitura sentensa ba krime ofensas ba integridade fízika simples ne'ebé envolve arguidu Abilio Pinto hasoru lezadu Francisco Menezes, iha Suku Afaloikai, Sub-distritu Uatulari, Distritu Viqueque.

Akuzasaun Prokuradór

Prokuradór akuza katak iha 28 Juñu 2017, iha tuku 20.40 kalan, arguidu tuku dala 1 iha lezadu nia hirus-matan no rezulta lezadu monu ba rai. Arguidu kontinua kaer lezadu nia ain no rasta to'o maizumenus metro 3 no rezulta kanek iha lezadu nia liman sikun no kanotak. Antes kazu ne'e akontese arguidu ne'ebé hanesan lezadu nia viziñu tolok lezadu no lezadu la simu no sira diskute malu, tanba ne'e arguidu komete aktu ne'e hasoru lezadu.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa.

Produsaun ba prova

Durante julgamentu, arguidu deklara katak iha akontesementu ne'e arguidu ho kondisaun lanu no koalia iha nia uma, derepente lezadu hatan-malu ho arguidu, nune'e arguidu ho lezadu diskute malu. Arguidu deklara katak nia kaer no aperta duni lezadu nia faru gola maibé lakonsege baku lezadu tanba lezadu nia oan mai haketak sira. Arguidu hatutan katak kona-ba lezadu monu tun ba rai ne'e, la'os tanba arguidu mak tuku, maibé lezadu monu mesak. Iha parte seluk lezadu kontinua konfirma faktus hotu iha akuzasaun.

Testemuña Ana Maria nu'udar lezadu nia oan depoimenta katak iha akontesementu ne'e testemuña estuda hela iha sala vizita, rona arguidu ho lezadu diskute malu, nune'e testemuña sai hosi uma laran no haree arguidu tuku dala 1 iha lezadu nia hirus matan no rezulta lezadu monu ba rai no testemuña mak ba rasta lezadu hamrik fali.

Alegasaun finál

Prokuradór konsidera arguidu provadu komete krime hasoru lezadu, mezmu arguidu nega faktus hotu iha akuzasaun, maibé lezadu no testemuña kontinua mantein no konfirma faktu hirak-ne'e. Tanba ne'e husu ba Tribunál aplika pena prizaun fulan 6 no suspende ba tinan 1.

Defeza husu ba Tribunál atu kondena arguidu ho pena ne'ebé adekuadu, tanba arguidu deklara katak iha akontesementu ne'e arguidu la komete krime hasoru lezadu.

Desizaun

Depoizde avalia faktus ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

7. Krime ofensa ba integridade fizika simples ho natureza violénsia doméstika

Nú. Prosesu	: 0074/17. VCVCB
Kompozisaun Tribunál	: Singulár
Juis	: Dr. Jose Quintão
Prokuradór	: Dr. Luis H. Rangel da Cruz
Defeza	: Dr. Alexandrina de Sousa (Advogada Privada)
Tipu pena	: Pena multa

Iha 7 Fevereiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JAB hasoru nia feen, iha Distritu Baucau.

Akuzasaun Prokuradór

Prokuradór akuza katak iha 11 Outubru 2017, iha tuku 08.00 dadeer, arguidu rasta ho maka'as lezada nia faru gola, tuku dala 2 iha lezada nia tilun-hun parte loos no rezulta lezada monu ba rai. Arguidu kontinua lori ai-sanak baku dala 3 iha lezada nia liman parte karuk no lezada nia ain parte loos.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Durante julgamentu arguidu deklarata katak nia lori duni ai-sanak baku dala 1 iha lezada nia liman parte loos no basa dala 2 iha lezada nia hasan no rekuza katak nia rasta maka'as iha lezada nia faru gola no tuku dala 2 iha tilun-hun. Arguidu mós deklarata katak depoisde akontesementu ne'e hakarak diak malu ho lezada, maibé lezada nia maun sira lakohi. Arguidu haktuir katak nia arrepende ona nia hahalok no promete sei la komete tan krime hanesan iha futuru no nafatin hare nia oan. Iha parte seluk lezada kontinua konfirma faktus sira iha akuzasaun, no lezada mós deklarata katak nia fahe-malu ona ho arguidu.

Alegasaun final

Prokuradór mantein ninia akuzasaun no konsidera arguidu provadu komete krime hasoru lezada bazeia ba deklarasaun parsial hosi arguidu no depoimentu hosi lezada nian. Atu halo prevensaun jerál no evita arguidu la komete tan krime hanesan iha futuru, husu ba Tribunál atu kondena arguidu ho pena prizaun fulan 3 suspende ba tinan 1.

Enkuantu Defeza haktuir katak arguidu konfesa deit faktus ne'ebé nia komete, depoisde akontesementu arguidu hakarak diak malu fali ho lezada, maibé lezada nia maun sira mak lakohi no arrepende ona nia hahalok. Tanba ne'e husu ba Tribunál fó justisa ba arguidu.

Desizaun

Tribunál konklui prosesu ne'e no kondena arguidu ho pena multa US\$22.50 ne'ebé sei selu 0.50 sentavus kada loraun durante loraun 45 no selu kustu judisiál US\$20.00. Tribunal mós fiksa pena alternativa durante loraun 20 prizaun, wainhira arguidu la kumpri pena refere.

8. Krime ofensa ba integridade fizika simples ho natureza violénsia domestika

Nú. Prosesu	: 0011/17. BCVMS
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Luis Hernani Rangel da Cruz
Defeza	: Dr. Sidonio M. Sarmiento
Tipu pena	: Pena prizaun fulan 6 suspende ba tinan 1

Iha 8 Fevereiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu PAS hasoru nia oan-feto, iha Distritu Baucau.

Akuzasaun Prokuradór

Prokuradór akuza katak 8 Novembru 2017, iha tuku 10.00 dadeer, arguidu tebe dala 2 iha lezada nia kotuk laran no riba lezada ba rai no rezulta moras iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'ó tinan 3 ka multa no konjuga ho artigu 2, 3, 35 no artigu 36 hosi LKVD.

Produsaun ba prova

Durante julgamentu, arguidu konfesa faktus hotu iha akuzasaun, arguidu mós deklara katak foin primeira-vez mai hatan iha Tribunál, arrepende ona nia hahalok no promete sei la komete tan krime hanesan hasoru lezada iha futuru. Iha parte seluk lezada kontinua konfirma faktus hotu iha akuzasaun.

Alegasaun final

Prokuradór konsidera arguidu provadu komete krime hasoru nia-oan bazeia ba konfisaun arguidu nian no deklarasaun hosi lezada. Tanba ne'e husu ba Tribunál atu kondena arguidu ho pena prizaun fulan 3 suspende ba tinan 1 no selu mós kustu judisiál ba Tribunál.

Iha parte seluk Defeza husu ba Tribunál atu kondena arguidu ho pena ne'ebé adekuaudu, tanba arguidu konfesa arrepende ona nia hahalok no foin primeira-vez mai hatan iha Tribunál.

Desizaun

Depoide avalia faktus ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu mós kustu judisiál US\$ 20.00.

9. Krime ofensa ba integridade fizika simples ho natureza violénsia doméstika

Nú. Prosesu	: 0003/17. BCLGA
Kompozisaun Tribunál	: Singulár
Juis	: Dr. Jose Goncalves
Prokuradór	: Dr. Ivonia Maria da Cruz
Defeza	: Dr. Antonio Fernandes
Tipu pena	: Pena multa

Iha 9 Fevereiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CX hasoru feen, iha Distritu Baucau.

Akuzasaun Prokuradór

Prokuradór akuza katak iha data ne'ebé la apuradu, maibé maisumenus iha fulan-Marsu 2017, arguidu tuku dala 1 iha lezada nia reen-toos no rezulta lezada sofre kanek no ran suli hosi lezada

nia reen-toos. Depoisde akontesementu ne'e lezada ba halo kedas tratamentu iha Centru Saúde Laga.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Durante julgamentu, arguidu deklara katak faktus iha akuzasaun ne'e loos hotu no arguidu mós deklara katak arrepende ona nia hahalok. Iha parte seluk lezada kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba faktus sira ne'ebé reflète hosi konfisaun arguidu no deklarasaun hosi lezada nian. Tanba ne'e husu ba Tribunál atu kondena arguidu ho pena prizaun fulan 6 no suspende ba tinan 2.

Enkuantu Defeza husu ba Tribunál aplika pena ne'ebé justu ba arguidu, tanba arguidu konfesa, arrepende ona nia hahalok no foin primeira-vez mai hatan iha Tribunál.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$45.00 ne'ebé sei selu 0.50 sentavus kada lora durante lora 90. Tribunál mós fiksa pena alternativa durante lora 60 prizaun, wainhira arguidu la kumpri pena refere.

10. Krime abuzu seksuál ba menór no agravasaun

Nú. Prosesu	: 0201/14. PDBAU
Kompozisaun Tribunál	: Kolektivu
Juis	: Dr. Jose Goncalves Dr. Afonso Carmona Dr. Hugo da Cruz Pui
Prokuradór	: Dr. Luis Hernani Rangel da Cruz
Defeza	: Dr. Jose Maria Guterres
Tipu pena	: Pena prizaun tinan 10

Iha 15 Feveiru 2018, Tribunál Distritál Baucau prezide julgamentu leitura akordaun ba krime abuzu seksuál ba menór ne'ebé envolve arguidu JMdS hasoru labarik ho idade tinan 3, iha Distritu Baucau.

Akuzasaun Prokuradór

Prokuradór akuza katak, iha 5 Marsu 2014, iha tuku 11.00 dadeer, lezada halimar hela iha lezada nia uma no lezada nia aman ba hela to'os. Arguidu hakbesik ba lezada no bolu lezada ba arguidu nia kuartu laran. Hafoin ida-ne'e, arguidu hatoba lezada iha kama leten hasai lezada nia roupa no ho obriga halo abuzu seksuál hasoru lezada.

Prokuradór akuza arguidu kontra artigu 177 alinea 1 Kódigu Penál kona-ba krime abuzu seksuál ba menór no artigu 182 letra (a) Kódigu Penál kona-ba agravausaun.

Produsaun ba prova

Durante julgamentu, arguidu konfesa faktus hotu iha akuzasaun, arguidu mós deklarata katak akontesementu ne'e iha uma adat laran. Arguidu deklarata katak arrepende ona nia hahalok no foin primeira-vez mai hatan iha Tribunál. Iha parte seluk wanhira juis sira husu tuir kona-ba akontesementu ne'e, lezada konfirma faktus hotu iha akuzasaun¹.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no deklarasaun hosi lezada. Aleinde ne'e Prokuradór mós haktuir katak iha akontesementu ne'e lezada ho idade ne'ebé mak ki'ik. Tanba ne'e husu ba Tribunál atu kondena arguidu ho pena prizaun tinan 20.

Defeza husu ba Tribunál atu kondena arguidu ho pena ne'ebé menus hosi alegasaun Prokuradór nian, tanba arguidu sei ho idade tinan 16, arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál.

Desizaun

Depoizide avalia faktus provadu sira ne'ebé produs durante julgamentu, Tribunál prova katak arguidu komete duni krime abuzu seksuál hasoru labarik ne'ebé ho idade menór. Tribunál haree mós ba arguidu nia idade ne'ebé foin 16 iha possibilidade arguidu bele muda ninia hahalok ne'e iha futuro, nune'e Tribunál konklui prosesu ne'e no kondena arguidu ho pena prizaun tinan 10.

11. Krime violasaun seksuál

Nú. Prosesu	: 0899/14. PDBAU
Kompozisaun Tribunál	: Kolektivu
Juis	: Dr. Jose Goncalves Dr. Afonso Carmona Dr. Jose Escurial
Prokuradór	: Dr. Ivonia Maria Guterres
Defeza	: Dr. Jose Maria Guterres
Tipu pena	: Pena prizaun tinan 16

Iha 15 Feveiru 2018 Tribunál Distrital Baucau prezide julgamentu leitura akordaun ba krime violasaun seksuál ne'ebé envolve arguidu CF hasoru lezada IdFX ho idade tinan 15, iha Distritu Viqueque.

Akuzasaun Prokuradór

Prokuradór akuza katak iha data no fulan ne'ebé la apurada, maibé iha inisiu tinan 2014, iha tuku 00.00 kalan, lezada ho nia alin ki'ik oan nain rua mak iha uma, tanba lezada nia inan aman ba

¹ Julgamentu ne'e hala'o iha maneira ne'ebé refilete lezada ninia idade katak juis no prokuradór sira inklui defeza sira la uja sira ninia atributu formal sira hanesan juis nian. Iha momentu hala'o julgamentu ne'e lezada halo ona tinan 8.

hela iha foho. Derepente arguidu tama hosi odamatan oin ne'ebé taka deit ho bebak no se tudik ba lezada no haruka lezada toba sae ba kama leten no ameasa katak se lezada lakohi arguidu sei oho tiha lezada nia alin nain rua. Nune'e ho tauk lezada toba tun ba kama leten arguidu hasai lezada nia rounpa no kaer lezada nia susun no rei lezada nia hasan no ho obriga halo relasaun seksuál ho lezada. Aktu ne'e rezulta lezada sofre moras iha nia orgaun seksuál no fakar ran barak. Depoide komete tiha aktu ne'e arguidu hatais fali nia kalsa no dehan ba lezada katak *"lekrauk taka odamatan ó nia aman nia liman a'at ona atu halo saida ba ha'u"*. Bainhira lezada nia inan aman fila lezada la fó hatene, tanba ta'uk arguidu atu oho lezada.

Tuir-mai maisumenus entre iha fulan Feveireiru ka Marsu tinan 2014 nia-laran, iha tuku 00.00 kalan, lezada ho nia alin nain rua mesak iha uma, arguidu kontinua ba lezada nia uma no ho obriga halo relasaun seksuál ho lezada no hosi relasaun seksuál ne'e rezulta lezada isin rua mak lezada foin fo hatene akontesementu ne'e ba lezada nia inan aman. Husi relasaun seksuál ne'e rezulta lezada partus bebe fetu iha fulan Novembru 2014.

Prokuradór akuza arguidu kontra artigu 172 Kódigu Penál kona-ba krime violasaun seksuál ho moldura penal tinan 5 to'o tinan 15.

Produsaun ba prova

Durante julgamentu, arguidu nega faktus hotu iha akuzasaun, no arguidu deklarata katak iha fulan Feveireiru 2014 arguidu moras mear-raan (TBC) no konsulta iha Ospital Referral Baucau, arguidu tenke kontrola no hemu ai moruk durante fulan 8. Tanba ne'e kuaze tinan 2014 ne'e arguidu moras iha deit uma. Iha parte seluk lezada kontinua konfirma faktus hotu iha akuzasaun katak krime ne'e akontese duni dala 2 to'o rezulta lezada isin rua no partus bebe fetu ida.

Alegasaun finál

Prokuradór haktuir katak arguidu nega totalmente ba faktus hotu iha akuzasaun, maibé lezada kontinua konfirma faktus sira iha akuzasaun. Prokuradór subliña katak iha akontesementu dala 2 ne'e arguidu aproveita wainhira lezada nia inan aman la iha uma no lezada mesak ho nia-alin sira. Tanba ne'e Prokuradór mantein akuzasaun no husu ba Tribunál atu inklui artigu 172 konjuga ho artigu 173 alinea (d) no husu ba Tribunál aplika pena prizaun ba arguidu.

Iha parte seluk, Defeza mós haktuir katak iha julgamentu arguidu deklarata katak la komete krime ne'e, tanba iha tinan 2014 arguidu moras TBC. Tanba ne'e husu ba Tribunál aplika pena ne'ebé justu ba arguidu.

Desizaun

Depoide avalia faktus asociadu sira ne'ebé prodús durante julgamentu, Tribunál konsidera katak prova katak arguidu komete duni krime violasaun seksuál hasoru lezada, mezmu arguidu nega faktus hotu, maibé Tribunál fiar katak faktus hotu provadu, bazeia ba depoimentu hosi lezada.

Antes konklui prosesu ne'e, Tribunál simu pedidu hosi Prokuradór nian hodi halo alterasaun ba kualifikasaun jurídiku ne'ebé antes ne'e Prokuradór akuza deit ho artigu 172 no konjuga mós ho

artigu 173 kona-ba agravasaun. Bazeia ba konsiderasaun sira ne'e Tribunál konklui prosesu ne'e no kondena arguidu ho pena prizaun tinan 16².

12. Krime abuzu seksuál ba menór no agravasaun

Nú. Prosesu : 0076/16. PDBAU
Kompozisaun Tribunál : Kolektivu
Juis : Dr. Afonso Carmona
Dr. Jose Goncalves
Dr. Hugo da Cruz Pui
Prokuradór : Dr. Luis Hernani Rangel da Cruz
Defeza : Dr. Jose Maria Guterres
Tipu pena : Pena prizaun tinan 20

Iha 15 Feveireiru 2018, Tribunál Distritál Baucau prezide julgamentu leitura akordaun ba krime abuzu seksuál ba menór no agravasaun ne'ebé envolve arguidu BdC (nu'udar viziñu) hasoru lezada ho idade tinan 11, iha Distritu Lautem.

Akuzasaun Prokuradór

Prokuradór akuza katak iha 29 Dezembru 2015, iha tuku 10.00 dadeer, wainhira lezada haris hotu iha be matan, atu fila ba uma, derepente arguidu mosu mai taka lezada nia ibun no dada ho obriga lezada ba du'ut laran hatoba lezada iha du'ut leten no halo relasaun seksuál ho lezada.

Iha 28 Dezembru 2015, iha tuku 19.00 kalan, wainhira lezada nia avo haruka lezada lori arguidu nia sigaru ba fó, arguidu kaer lezada nia liman dada ba kuartu laran ho obriga taka lezada nia ibun no halo relasaun ho lezada.

Iha 27 Dezembru 2015, wainhira lezada nia inan ho aman laiha, arguidu ba iha lezada nia uma lori tudik ameasa lezada atu halo relasaun seksuál, maibé aktu ne'e la konsege realiza, tanba lezada nia alin sira barak.

Iha 26 Dezembru 2015, iha tuku 17.00 lokraik, lezada hodi masa rua ba kuru be iha be matan, wainhira lezada atu fila ba uma, derepente arguidu mosu mai kaer ho arguidu nia roupa laran no taka ba lezada nia ibun halo lezada la bele hakilar. Aleinde ne'e arguidu mós lori tudik ameasa lezada, no depois arguidu dada lezada ba du'ut laran kolu lezada nia roupa no halo relasaun seksuál ho lezada no rezulta ran sai barak hosi lezada nia orgaun seksuál.

Prokuradór akuza arguidu kontra artigu 177 alinea (1) Kódigu Penál kona-ba krime abuzu seksuál ba menór no artigu 182 alinea (1) letra (a) Kódigu Penál kona-ba agravasaun no lezada nia idade menus hosi 12 no artigu 35 Kódigu Penál kona-ba krime iha konkursu.

Produsaun ba prova

² Iha prosesu produsaun ba prova, arguidu deklarata katak nia sofre moras mear-raan (TBC), tanba ne'e Tribunál ka Defeza ne'e reprezenta arguidu la konsege husu ba tribunál atu verifika deklarasaun arguidu ho Ospital Referál Baucau ne'e arguidu refere katak nia halo hela tratamentu ba nia moras.

Durante julgamentu, arguidu uza direitu nonok. Iha parte seluk lezada kontinua konfirma faktus hotu iha akuzasaun, lezada mós deklara katak wainhira atu halo relasaun ho lezada, arguidu sempre obriga no lori tudik ameasa lezada.

Alegasaun final

Prokuradór konsidera katak mesmu arguidu uza direitu nonok, maibé Prokuradór afirma katak arguidu provadu komete krime abuzu seksuál ba menór hasoru lezada, no lezada kontinua konfirma faktus hotu iha akuzasaun no krime ne'e akontese dala 4. Tanba ne'e husu ba Tribunál aplika pena prizaun tinan 30 ba arguidu.

Iha parte seluk Defeza haktuir katak iha julgamentu arguidu hili direitu nonok maibé lezada kontinua konfirma faktus sira hotu iha akuzasaun. Tanba ne'e husu ba Tribunál fo justisa ba arguidu.

Desizaun

Depoisde avalia faktus provadu sira ne'ebé produs durante julgamentu, Tribunál konklui katak arguidu provadu komete duni krime abuzu seksuál ba menór dala 4. Tribunál mós prova katak arguidu komete aktu ne'e ho forma obriga no ameasa hasoru lezada. Tanba ne'e Tribunál konklui prosesu ne'e no kondena arguidu ho pena prizaun tinan 20 kadeia.

13. Krime ameasa

Nú. Prosesu	: 0056/17.BCBCV
Kompozisaun Tribunál	: Singular
Juis	: Dr. Jose Quintão
Prokuradór	: Dra. Ivonia M. Guterres
Defeza	: Dr. Grigorio Jose de Lima
Tipu pena	: Pena multa

Iha 15 Feveireiru 2018, Tribunál Distritál Baucau prezide julgamentu leitura sentensa ba krime ameasa ne'ebé envolve arguidu Sezario Freitas Guterres hasoru lezadu Juviano soares, iha Suku Gariwai, Sub-distritu Baucau vila, Distritu Baucau.

Akuzasaun Prokuradór

Prokuradór akuza katak iha 2 Agosto 2017, iha tuku 17.30 lokraik, lezadu ho nia kolega sira atu ba haris iha be-matan. Wainhira lezadu sira to'o iha be-matan arguidu Sezario Freitas Guterres haris hela iha ne'ebá. Derepente arguidu tolok lezadu no lori katana duni lezadu.

Prokuradór akuza arguidu kontra artigu 157 Kódigu Penál kona-ba krime ameasa ho moldura penal to'o tinan 2 ka multa.

Produsaun ba prova

Durante julgamentu arguidu deklara katak iha akontesementu ne'e arguidu haris hela iha be-matan derepente lezadu ho nia maluk sira to'o mai dehan ba arguidu katak "*nusa halo foer fali be ne'e*", nune'e arguidu nervozu tolok no lori katana ameasa lezadu. Iha parte seluk lezadu deklara katak iha akontesementu ne'e, lezadu ho nia kolega sira haris hela iha be matan, derepente

arguidu tolok lezadu no lori katana duni tuir lezadu, nune'e lezadu tauk no fó hatene ba xefe suku.

Testemuña Angelo Marques Freitas no Felizadu Dias Ximenes nu'udar lezadu nia kolega depoimenta katak sira nain tolu lezadu atu ba haris iha be-matan, wainhira sira konta istoria no hamnasa derepente arguidu tolok lezadu no lori katana duni tuir lezadu.

Alegasaun final

Prokurador konsidera arguidu provadu komete krime amesa hasoru lezadu, tanba ne'e husu ba Tribunál atu kondena arguidu ho pena prizaun fulan 6 no suspende ba tinan 2.

Enkuantu Defeza husu ba Tribunál atu kondena arguidu ho pena ne'ebé adekuadu, tanba iha akontesementu ne'e lezadu mak provoka uluk arguidu.

Desizaun

Tribunál konklui prosesu ne'e no kondena arguidu ho pena multa US\$15.00 ne'ebé sei selu 0.50 sentavus kada loron durante loron 30. Tribunál mós fiksa pena alternativa durante loron 20 prizaun, wainhira arguidu la kumpri pena multa refere.

14. Krime ofensa ba integridade fizika simples ho natureza violéncia doméstika

Nú. Prosesu	: 0034/17. PDBAU
Kompozisaun Tribunál	: Singular
Juis	: Dr. Jose Goncalves
Prokurador	: Dr. Luis Hernani Rangel da Cruz
Defeza	: Dr. Grigorio de Lima
Tipu pena	: Pena prizaun fulan 6 suspende ba tinan 1

Iha 26 Feveireiru 2018, Tribunál Distritál Baucau, prezide julgamentu leitura sentensa ba krime ofensa ba integridade fizika simples ho natureza violéncia doméstika ne'ebé envolve arguidu LdCG hasoru nia feen, iha Distritu Lautem.

Akuzasaun Prokurador

Prokurador akuza katak iha 25 Marsu 2017, iha tuku 7.00 dadeer, arguidu lori kanedok baku dala 2 iha lezada nia kanuruk, tebe dala 1 iha lezada nia kabun kidun no tebe dala 2 iha lezada nia kotuk laran no rezulta lezada oin nakukun no monu ba rai.

Prokurador akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no 36 LKVD.

Produsaun ba prova

Durante julgamentu arguidu deklara katak faktus ne'ebé loos mak, arguidu baku dala 2 iha lezada nia kotuk laran no basa dala 2 iha lezada nia hasan karuk no rekuza katak nia la tebe lezada nia kabun kidun no kotuk laran. Arguidu diak malu ona ho lezada, foin primeira-vez mai

hatan iha Tribunál no arrepende ona nia hahalok. Iha parte seluk lezada konfirma faktus hotu iha akuzasaun, lezada mós deklara katak diak malu ona ho arguidu.

Alegasaun final

Prokuradór konsidera arguidu provadu komete krime hasoru lezada. Tanba ne'e, ba interese prevensaun atu arguidu la repete tan ninia hahalok ne'e iha futuru hasoru lezada, husu ba Tribunál atu kondena arguidu ho pena prizaun fulan 4 suspende ba tinan 1.

Iha parte seluk Defeza husu ba Tribunál atu kondena arguidu ho pena ne'ebé adekuadu, tanba arguidu deklara deit faktus ne'ebé nia komete, arrepende ona nia hahalok, diak malu ona ho lezada no foin primeira-vez mai hatan iha Tribunál.

Desizaun

Depoiz de avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

15. Krime ofensa ba integridade fizika simples ho natureza violénsia doméstika

Nú. Prosesu	: 0001/17. BCLGA
Kompozisaun Tribunál	: Singular
Juis	: Dr. Jose Goncalves
Prokuradór	: Dra. Ivonia Maria Guterres
Defeza	: Dr. Grigorio de Lima
Tipu pena	: Pena prizaun tinan 1 suspende ba tinan 2

Iha 26 Feveireiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebe envolve arguidu DC hasoru nia feen, iha Distritu Baucau.

Akuzasaun Prokuradór

Prokuradór akuza katak, iha 10 Janeiru 2017, iha tuku 15.00 lokraik, arguidu lori ai-tukan (ai-ne'ebé sunu ona iha ahi nia-rohan) baku dala 1 iha lezada nia ibun no rezulta lezada sofre moras no bubu iha lezada nia ibun. Aktu ne'e rezulta lezada konsege ba halo tratamentu iha Centru Saúde Laga.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 hosi LKVD.

Produsaun ba prova

Durante julgamentu arguidu hili direitu nonok, mezmu nune'e lezada konfirma faktus hotu iha akuzasaun, maibé lezada mós deklara katak diak malu ona ho arguidu.

Alegasaun final

Prokuradór konsidera arguidu provadu komete krime hasoru lezada, tanba ne'e husu ba Tribunál aplika pena prizaun tinan 1 suspende ba tinan 3.

Iha parte seluk Defeza haktuir katak iha produsaun ba prova arguidu hili direitu nonok, maibé lezada kontinua konfirma faktus hotu iha akuzasaun. Tanba ne'e husu ba Tribunál aplika pena suspensaun ba arguidu hodi evita arguidu la repete hahalok hanesan iha futuru.

Desizaun

Depoizde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 1 suspende ba tinan 2.

16. Krime ofensa ba integridade fizika simples ho natureza violénsia doméstika

Nú. Prosesu	: 0020/14. BCBCV
Kompozisaun Tribunál	: Singulár
Juis	: Dr. Jose Goncalves
Prokuradór	: Dr. Domingos Goveia Barreto
Defeza	: Dr. Sidonio Maria Sarmiento
Tipu pena	: Pena multa

Iha 26 Feveireiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CM hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 11 Maio 2017, iha tuku 09.00 dadeer, arguidu lori ai-sanak ho medida metru 1 baku dala 1 iha lezada nia kabaas parte karuk.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no 36 hosi LKVD.

Produsaun ba prova

Durante julgamentu, arguidu konfesa faktus hotu iha akuzasaun, arguidu mós deklarara katak diak malu ona ho lezada, foin primeira-vez mai hatan iha Tribunál no arrepende ona nia hahalok. Aleinde ne'e lezada mós kontinua konfirma faktus sira hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada, tuir konfisaun arguidu nian no deklarasaun hosi lezada nian. Tanba ne'e husu Tribunál aplika pena prizaun fulan 6 suspende ba tinan 1.

Iha parte seluk Defeza husu ba Tribunál atu kondena arguidu ho pena ne'ebé adekuadu, tanba arguidu konfesa faktus hotu iha akuzasaun, arrepende ona nia hahalok no diak malu ona ho lezada.

Desizaun

Tribunál konklui prosesu ne'e no kondena arguidu ho pena multa US\$90.00 ne'ebé sei selu US\$1.00 kada loron durante loron 90. Tribunál mós fiksa pena alternativa durante loron 60 prizaun, wainhira arguidu la kumpri pena refere.

17. Kazu ofensa ba integridade fizika simples

Nú. Prosesu : 0051/17. PCSIC
Kompozisaun Tribunál : Singular
Juis : Dr. Jose Quintão
Prokuradór : Dr. Gustavo Agostu da Silva Morreira
Defeza : Dr. Jose M. Guterres
Tipu pena : Pena prizaun tinan 2 suspende ba tinan 3

Iha 27 Feveireiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ne'ebé envolve arguidu Antonio Francisco de Jesus Soares hasoru lezadu Eugenio Egas Moniz (membro F-FDTL), iha Suku Iliheu, Sub-distritu Manatuto, Distritu Manatuto.

Akuzasaun Prokuradór

Prokuradór akuza katak iha 16 Agostu 2017, iha tuku 04.00 madrugada, lezadu partisipa nia primu nia kazamentu, sein razaun ne'ebé klaru arguidu hakbesik lezadu no tuku dala 1 iha lezadu nia inus no tuku dala barak iha lezadu nia tilun no rezulta lezadu monu ba rai no ran sai barak.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa.

Produsaun ba prova

Durante julgamentu, arguidu konfesa faktus hotu iha akuzasaun no deklarata katak iha akontesementu ne'e arguidu ho kondisaun lanu todan no la hatene-an. Arguidu mós deklarata katak depoisde akontesementu ne'e arguidu tenta atu diak malu ho lezadu, maibé lezadu mak lakohi. Arguidu deklarata katak arrepende ona nia hahalok no foin primeira-vez mai hatan iha Tribunál. Iha parte seluk lezadu kontinua konfirma faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezadu, tanba ne'e husu ba Tribunál atu kondena arguidu ho pena prizaun tinan 1 suspende ba tinan 2.

Defeza husu ba Tribunál atu kondena arguidu ho pena ne'ebé adekua, tanba arguidu konfesa, arrepende ona nia hahalok no foin primeira-vez mai hatan iha Tribunál. Aleinde ne'e depoisde akontesementu arguidu tenta atu diak malu ho lezadu, maibé lezadu mak lakohi.

Desizaun

Depoisde avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 3 no selu mós kustu judisiál US\$20.00.

18. Kazu ofensa ba integridade fizika simples ho natureza violénsia doméstika

Nú. Prosesu : 0011/17. BCPVN
Kompozisaun Tribunál : Singular
Juis : Dr. Afonso Carmona

Prokuradór : Dr. Domingos Goveia Barreto
Defeza : Dr. Sidonio Maria Sarmiento
Tipu pena : Pena prizaun fulan 6 suspende ba tinan 1

Iha 27 Feveiru 2018, Tribunál Distritál Baucau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JC hasoru nia feen, iha Distritu Baucau.

Akuzasaun Prokuradór

Prokuradór akuza katak iha 21 Setembru 2017, iha tuku 07.00 dadeer, arguidu tuku dala 1 iha lezada nia kotuk laran no tebe dala 1 iha lezada nia kidan. Arguidu kontinua lori raga etu nian baku dala 1 iha lezada nia liman parte loos no foti fatuk tuda dala 1 iha lezada nia ain fuan parte loos. Aktu ne'e rezulta lezada konsege ba halo tratamentu iha Centru Saude Venilale.

Prokuradór akuza arguidu kontra artigu 145 Kódigu Penál kona-ba krime ofensa ba integridade fizika simples ho nia moldura penal to'o tinan 3 ka multa no konjuga ho artigu 2, 3, 35 no artigu 36 LKVD.

Produsaun ba prova

Durante julgamentu, arguidu deklara katak faktus iha akuzasaun ne'e los hotu no arguidu mós deklara katak arrepende ona nia hahalok no foin primeira-vez mai hatan iha Tribunál. Iha parte seluk lezada kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba faktu sira ne'ebé reflète hosi akuzasaun ne'ebé reforsa ho konfisaun arguidu nian no deklarasaun hosi lezada. Tanba ne'e husu ba Tribunál atu kondena arguidu ho pena prizaun fulan 8 suspende ba tinan 1 fulan 6.

Enkuantu Defeza husu ba Tribunál aplika pena ne'ebé kmaan ba arguidu, tanba arguidu konfesa, arrepende ona nia hahalok no foin primeira-vez mai hatan iha Tribunál.

Desizaun

Bazeia ba faktus provadus sira ne'ebé prodús durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1 no selu mós kustu judisiál US\$ 10.00.

19. Krime maus tratus ba kónjuje

Nú. Prosesu : 0008/17.BCSIC
Kompozisaun Tribunál : kolektivu
Juis : Dr. José Escurial
Dr. Jose Gonsalves
Dr. Hugo da Cruz Pui
Prokuradór : Dr. Luis Hernanio Rangel da Cruz
Defeza : Dr. Mujariah (Advogada Privadu)
Tipu pena : Pena prizaun tinan 2 suspende ba tinan 2

Iha 27 Feveireu 2018, Tribunál Distritál Baucau prezide julgamentu leitura akordaun ba krime maus tratus ba kónjuje ne'ebé envolve arguidu FPG hasoru nia feen, iha Distritu Baucau.

Akuzasaun Prokuradór

Prokuradór akuza katak iha 11 Feveireu 2017, iha tuku 04.00 madrugada, arguidu buti dala 1 iha lezada nia kakorok, riba lezada ba rai no lori tudik ko'a modo nian ameasa lezada. Iha tinan 2015, arguidu tuku dala barak iha lezada nia kotuk laran no iha antes akontesementu sira ne'e arguidu mós sempre baku lezada. Aktu ne'e rezulta lezada sente tauk no la livre husi arguidu.

Prokuradór akuza arguidu kontra artigu 154 Kódigu Penál kona-ba krime maus tratus ba kónjuje ho nia moldura penal tinan 2 too tinan 6 no konjuga ho artigu 2, 3, 35 no artigu 36 LKVD.

Produsaun ba prova

Durante julgamentu arguidu konfesa faktus hotu iha akuzasaun, arguidu mós deklarara katak arrepende ona nia hahalok, foin primeira-vez mai hatan iha Tribunál no promete sei la komete tan krime hanesan hasoru lezada iha futuro. Iha parte seluk lezada konfirma faktus hotu iha akuzasaun.

Alegasaun finál

Prokuradór konsidera faktus hotu provadu bazeia ba konfisaun arguidu nian no deklarasaun hosi lezada. Tanba ne'e husu ba Tribunál atu aplika pena prizaun tinan 2 suspende durante tinan 3.

Iha parte seluk Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé kmaan ba arguidu.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 2 no selu mós kustu judisiál US\$20.00.

20. Krime ofensa integridade fízika simples ho natureza violénsia doméstika

Nú. Prosesu	: 0018/17.VQOSU
Kompozisaun Tribunál	: Singulár
Juis	: Dr. Antonio Fonseca
Prokuradór	: Dr. Gustavo Agostu da Silva Morreira
Defeza	: Dr. Sidonio Maria Sarmiento
Tipu pena	: Pena prizaun fulan 3 suspende ba tinan 1 fulan 6

Iha 27 Feveireu 2018, Tribunál Distrital Baucau, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EM hasoru nia feen, iha Distritu Viqueque.

Akuzasaun Prokuradór

Prokuradór akuza katak iha 5 Agostu 2017, iha tuku 10.30 dadeer, arguidu tuku dala 4 iha lezada nia kotuk laran, no tuku dala 5 iha lezada nia reen-toos. Arguidu kontinua tuku dala 1 iha lezada nia ulun, tebe dala 4 iha lezada nia kelen no tebe dala 4 iha lezada nia kotuk laran.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal to'o tinan 3 ka multa konjuga ho artigu 2, 3 no 35 LKVD.

Produsaun ba prova

Arguidu deklara katak faktus iha akuzasaun ne'e loos hotu, no arguidu mós deklara katak arrepende ona nia hahalok no promete sei la repete hahalok ne'e iha futuru hasoru lezada. Iha parte seluk lezada deklara ba Tribunál katak faktus sira iha akuzasaun ne'e loos hotu.

Alegasaun finál

Prokuradór konsidera arguidu provadu komete krime hasoru lezada bazeia ba faktus sira ne'ebé reflète hosi konfisaun arguidu nian no deklarasaun hosi lezada. Maibé atu halo prevensaun jerál arguidu la komete tan krime hanesan hasoru lezada iha futuru, husu ba Tribunál atu kondena arguidu ho pena prizaun tinan 1 no suspende ba tinan 2.

Enkuantu Defeza husu ba Tribunál atu kondena arguidu ho pena ne'ebé kmaan, tanba arguidu konfesa, arrepende ona nia hahalok no promete sei la komete tan krime hasoru lezada iha futuru.

Desizaun

Depoisode avalia faktus ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 3 suspende ba tinan 1 fulan 6.

21. Krime ofensa ba integridade fízika simples ho natureza violénsia doméstika

Nú. Prosesu	: 0022/16.VQWTL
Komposisauns Tribunál	: Singulár
Juiz	: Dr. José Quintão
Prokuradór	: Dr. Gustavo Agostu da Silva Morreira
Defeza	: Dr. Jose Maria Guterres
Tipu pena	: Pena multa

Iha 27 Feveiru 2018 Tribunál Distritál Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu OA hasoru nia feen, iha Distritu Baucau.

Akuzasaun Prokuradór

Prokuradór akuza katak iha 28 Dezembru 2016, iha tuku 20.00, arguidu tuku dala 2 iha lezada nia ulun no rezulta lezada sofre moras iha ulun.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal to'o tinan 3 ka multa no konjuga ho artigu 2, 3, 35 no artigu 36 hosi LKVD.

Produsaun ba prova

Durante julgamentu arguidu konfesa faktus hotu iha akuzasaun, arguidu deklara katak foin primeira-vez mai hatan iha Tribunál, arrepende ona nia hahalok no diak malu ona ho lezada. Nune'e mós lezada kontinua konfirma faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba faktus sira ne'ebé mai hosi konfisaun arguidu no deklarasaun hosi lezada nian. Tanba ne'e husu ba Tribunál atu kondena arguidu ho pena prizaun tinan 1 suspende ba tinan 1 fulan 6.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé kmaan ba arguidu.

Desizaun

Tribunál konklui prosesu ne'e no kondena arguidu ho pena multa US\$15.00 ne'ebé sei selu 0.50 sentavus kada lora durante lora 30. Tribunál mós fiksa pena alternativa durante lora 20 prizaun, wainhira arguidu la kumpri pena refere.

22. Krime explorasaun ba jogo ilísitu

Nú. Prosesu	: 0014/16.MNMNT
Komposizaun Tribunál	: Singular
Juis	: Dr. Antonio Fonseca
Prokuradór	: Dr. Luis Hernani Rangel
Defeza	: Dr. Gregorio Jose de Lima
Tipu pena	: Pena multa

Iha 27 Feveireu 2018, Tribunál Distritál Baucau prezide julgamentu leitura sentensa ba krime explorasaun ba jogo ilísitu ne'ebé envolve arguidu Jose Antonio Soares, Domingos Ruas da Silva no Gaspar Romaldo Ximenes hasoru Estadu RDTL, iha Suku Ailili, Sub-distritu Manatuto, Distritu Manatuto.

Akuzasaun Prokuradór

Prokuradór akuza katak iha 9 Marsu 2016, Polisia hala'o operasaun ba jogos ilegais (SDSB) no prende kupon mutin hamutuk pakote lima, ne'ebé mak arguidu Jose Antonio Soares no Domingos da Silva faan hela iha merkadu Manatuto. Enkuantu arguidu Gaspar Romaldo ho iniciativa rasik ba entrega kupon mutin (SDSB) ba iha Polisia Eskuadra Manatuto.

Prokuradór akuza arguidu sira kontra artigu 322 alinea (1) Kódigu Penál kona-ba explorasaun ba jogo ilísitu ho moldura penal tinan 3 ka pena multa.

Produsaun ba prova

Iha julgamentu arguidu sira konfesa faktus hotu iha akuzasaun, arguidu sira mós deklara katak arrepende ona sira nia hahalok, foin primeira-vez mai hatan iha Tribunál no promete sei la komete tan krime hanesan iha futuro.

Alegasaun final

Prokuradór konsidera arguidu sira provadu komete krime explorasaun ba jogu ilísitu. Atu halo prevensaun arguidu sira hodi la komete tan krime hanesan iha futuru, husu ba Tribunál atu kondena arguidu sira ho pena multa.

Iha parte seluk Defeza haktuir katak arguidu sira konfesa faktus hotu iha akuzasaun, foin primeira-vez mai hatan iha Tribunál no arrepende ona sira nia hahalok. Tanba ne'e husu ba Tribunál aplika pena ne'ebé adekua ba arguidu sira.

Desizaun

Tribunál konklui prosesu ne'e no kondena arguidu Jose Antonio Soares ho pena multa US\$ 30.00 ne'ebé sei selu US\$1.00 kada lora durante lora 30. Ba arguidu Domingos Ruas da Silva, Tribunál kondena ho pena multa US\$60.00 ne'ebé sei selu US\$2.00 kada lora durante lora 30.

Enkuantu ba arguidu Gaspar Romaldo Tribunál kondena ho pena multa US\$75.00 ne'ebé sei selu US\$2.50 kada lora durante lora 30 no arguidu sira selu mós kustu judisiál US\$10.00. Tribunál mós fiksa pena alternativa durante lora 20 prizaun ba arguidu sira, wainhira arguidu sira la kumpri pena multa refere.

23. Krime ofensa ba integridade física simples

Nú. Prosesu	: 0011/17. BCLGA
Komposizasun Tribunál	: Singulár
Juis	: Dr. Antonio Fonseca
Prokuradór	: Dr. Gustavo Agostu da Silva Morreira
Defeza	: Dr. Jose Maria Guterres
Tipu pena	: Omologa pedidu dezisténcia keixa

Iha 28 Feveiru 2018, Tribunál Distritál Baucau prezide julgamentu tentativa konsiliaun ba krime ofensa ba integridade física simples ne'ebé envolve arguidu Alberto da Silva hasoru lezadu Domingos da Costa, iha Suku Nunira, Sub-distritu Laga, Distritu Baucau.

Akuzasaun Prokuradór

Prokuradór akuza katak iha 19 Juñu 2017, iha tuku 5.00 lokraik, lezadu atu ba haris iha be matan no hare katak arguidu lere hela to'os ne'ebé pertense ba lezadu nian. Wainhira lezadu tama ba to'os laran, arguidu hakilar no duni kedas lezadu, arguidu mós foti fatuk tuda dala 1 iha lezadu nia kanotak no rezulta lezadu monu ba rai no kauza kanek iha lezadu nia reen-toos.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho moldura penal to'o tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, tanba ne'e antes tama ba produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu husu deskulpa ba lezadu, arrende ona nia hahalok. Arguidu mos deklarata katak pronto atu fó kuda 1 ba lezadu, tanba arguidu ho lezadu se iha relasaun familia. Lezadu konkorda ho pedidu ne'e no husu ba Tribunál atu dezisté ninia-keixa hasoru arguidu.

Alegasaun final

Prokurador no Defeza apresia ho akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, Tribunál konklui prosesu ne'e no omologa akordu dame entre parte sira.

Atu hetan informasaun kompletu bele kontaktu ba:

Luis de Oliveira Sampaio
Diretor Ezekutivu JSMP
Diresaun e-mail: luis@jsmp.tl
info@jsmp.tl